

隨

山

館

猥

稟

隨山館猥藁卷之六

山陰 汪琬

詩已

元旦微雨率成小詩

以下壬申

山閣霏霏雨江城漠漠春農時連小卯膏澤及元辰卻

掃思鄉客

元旦不掃地
吾鄉舊俗也

衝泥賀歲人瓶梅靜相對喜見

數花新

二月三日發潮州至蔡家園與朱穎白郡丞

用

孚

泊姚生

文駿

別

韶月天氣新輕舟發沙坂貧交重離別相送不言遠平生締蘭言同志滋蕙畹非不惜解攜所嗟處窮蹇旅食方驅人何由同息偃此別悲河梁它時隔雲巘征途水國春落日江城晚因見故人心終殊自厓返

嘉應道中

昔過梅州道風光送客船梯田青疊嶺沙岸白生烟照影驚雙鬢重經忽五年江鷗應笑我容易見華顛

長樂道中六言四首

松谿十里五里茆屋一家兩家釣石半依垂柳平橋流

出殘花

草色綠侵細雨水光碧漾輕雲忽見銜泥小燕天涯明

日春分

曲曲層層沙渚高高下下山田人家不知何處樹杪時

見炊烟

雲氣漸銷高樹雷聲尙在前峰山城將到未到塢影斜

陽半紅

龍川懷古

千秋人說越王臺締構先從此邑開秦漢之間分霸氣

韓彭而外有奇才平生際會任巋始晚景飛騰陸賈來
太息獲嘉名縣後老夫遺蹟總蒿萊

戲題小梅畫梅冊六言四首

春風千樹萬樹墨雨一花兩花可記澹烟寒月鑑湖雪

後人家

墨梅

邈矣華光長老翛然煮石山農喚起山陰二樹故應不
墮宗風

天地初心難測乾坤清氣誰知三十六宮春色重重太
極圈兒

絳綃都成霞影紫笛誰弄春聲試覓詞仙白石更摹新

曲紅情

紅梅

送友人歸鎮江

旅況南州榻鄉愁北固山頻年歌劍鋏此日賦刀環客
路連三月春風別百蠻神龍有毛骨未用羨天閑

城南消夏雜詠十首

有序

余生長廣州習其風土比年旅泊他郡卻望僑寓有如
故鄉今夏自潮州歸僦居城南閉關避暑意有所觸輒
成小詩彙而錄之凡十截句

頻年江嶺著行窩近許南園步履過消暑此中差不惡
兩株高柳一池荷

謝公山沼事何夸韓子盆池願亦奢買得石灣三石甕

小庭間種水芝花

石灣在會城西
南地多窯戶

唐園舊址近西郊想見蘋珠綴碧梢日午市橋紅一色

牙籤新署玉荷包

市中售荔枝者以籤標
名品玉荷包其一也

閒街吹過綠槐風有客承蜩技最工知了一聲天正午

兒童爭買荔枝蟲

廣州呼蟬爲荔枝蟲有捕以售者
箬葉裹之搖令作聲以誘小兒

誰烹翠英碾瓊沙更驚黎祁泛玉花解得文園消渴未

冰盤涼剖綠沈瓜

市中鬻豆粥者碎礪入釜曰綠豆砂又菽乳之甫結者曰豆腐花二物皆

售於
夏日

城南燈火認閒坊盲女琵琶夜作場唱到珠江舊時曲

有人彈淚說招郎

入夜巷陌間多盲女鬻歌道中招銘山大令庸譔粵謳一時爭歌之近

稍稀矣有老嫗年八十餘尚能道銘山舊事

青絲繫纜碧筒杯記向江干追暑來一樣榕陰風月夜

不堪重問海珠臺

海珠卽宋李忠簡讀書臺臺側多老榕其下可以納涼往遇盛暑時簫鼓

畫船多集於是

朋輩山堂把酒卮綠陰多處共追隨此君亭子今無恙

蒲扇茶鐺又一時

學海堂在粵秀山麓中有此君亭傍多竹樹道光咸豐間嘗偕友人於此

消夏

周北張南未結鄰
禰生毛刺動淹旬
不關身似閒雲懶
怕作衣冠襍藏人

旅食都無負郭田
治生難蓄賣文錢
祇應三月蒔齋住

成就湖州泊宅編

近效宋人說部作松煙小錄已得數卷

睡起讀書用彭城集中南窗詩韻二首

草堂著藜牀適意
非尙儉貧居效豪侈
勉強亦慙忝微颺
入簾薄涼意生枕簟
北窗跂腳眠偃息
謝拘檢襍藏

彼何人見笑徒自黠敢曰矢勿過庶幾志無慊

客來不報謁竊冀友朋亮睡起尋展書貴使襟抱鬯一
編甫開陳萬彙悉昭曠細素生古香丹黃寄微尙點勘
雖罷勞停披復怙悵陶公敦夙好此語定非妄妙悟忽
自來水流更花放抗懷八極間希志千載上宇宙入方
寸邈然不可狀何必名山遊區區傲禽向

夏日齋居戲效山谷體

穀廩道人賃屋居矮几卻有三尺書坐窗不邀茶一盃
靜思綠陰午眠餘忽聞打門送文字正用此時持事至

瓦盆白藕遲作花賴爾娟娟解人意

七月十五夜偕陳蘭甫學錄澧林子隅太守直

何乃嘉上舍懋曾南園看月二首

問訊南園路真成物外幽方塘三畝水圓月一分秋夜
久蕉衫薄涼多茗椀收此中饒古意欲去更遲留

十子謳吟地千秋悵望中前賢壇坫在陳迹履綦空對
影憐今月論文憶古風不知清夜景甯與昔時同

和作

番禺陳澧蘭甫

詩人與明月同我到南園一樹柳絲少半池荷葉繁

臺高名以棧地僻景如邨更約中秋夜還來共一尊

秋陰四首

每到斜陽一惘然秋心如夢復如煙涼生水竹無人處
暝合池臺欲雨天早雁晚蛩纔幾日阻風中酒動經年
模糊一片梧桐影遮斷闌干碧可憐

亂鴉衰柳自紛紛獨立蒼茫日易曛澹墨畫成山一角
昏黃涼入水三分蘆花白顯空灘雪榭葉黃低古寺雲
歸向蕭蕭蕭槭甚茶香銷盡有鑪薰

黃葉聲多酒不辭

用崔不雕句

無端秋思太迷離荒荒水驛

寒生早漠漠江颿客去遲夕靄幾回勞遠望涼煙如與
寫相思試看接地風雲色應記夔州老杜詩

秋色冥濛畫不成空廊容易暮寒生堂深歸燕疑簾影
酒醒涼蟬誤雨聲白菊光陰偏晚晚紅蘭愁思未分明
破除欲借西風力好爲霜蟾乞放晴

客自甘肅軍中歸和余秋陰詩多道邊塞間景
物復和二首

一望邊城意闌寥衰榆殘柳共蕭蕭平原日澹圖千帳
大漠雲低下一雕戰氣荒寒天易暝古懷蒼莽酒難消

夜深倚劍營門立可見星河影動搖

平沙莽莽野漫漫塞上秋光不耐看落葉有人悲隴首
浮雲何處認長安聲沈鼓角黃塵合影黯旌旗白日寒
聞道輪臺城北戍曉來霜氣沒征鞍

歲暮感懷

久矣北山誚依然東郭貧風霜畱畚草歲月愧勞薪蓬
葆今殘客梅花舊比鄰南枝應笑我頭白尙依人

元日用壬申韻

以下癸酉

際會中天日歡娛大地春似聞行上道況復值端辰簫

鼓覘民氣衣冠到野人桃符書吉語聊紀歲華新

正月五日遊花埭呈同遊諸君子

并序

花埭在珠江之西南距廣州十里許居人以執花爲業
士夫園亭亦多在焉樓臺繡錯卉木綺交青序初臨紅
芳相映攀條采香者咸萃於是圖經所傳名實舊矣同
治癸酉立春前二日朋儕見招遊事伊始出魚藻登鷁
舟錦帆旣張舉酒相屬衣白袷而微暖水綠波而欲潮
曾未逾時爰至其所川原曠其遐矚風日助其暢豫陽
和棣通芳郁萍布士女雜還管絃遠聞倚裳意行游展

幾遍旣而夕日將落晚潮漸生嚴城遙隔輕艫亟返聽
鼙更之告警敝魚鑰而啟扃迄還所居漏已再下夫四
美備具百年罕逢是以會稽歡宴無間親知輞水勝遊
必招素友況夫正月五日適副斜川之期君子九能竊
希垂隴之會賞心樂事游目騁懷豈可自吝篇題不思
間寫者乎將摹春泛之圖先賦花游之曲諸公旣斐然
有作賤子亦率爾繼聲匪侈遨頭聊供拊掌是日同游
者彭南屏林子隅兩太守胡敬甫蘊玉仲兩郡丞馮雲
伯大令戴雲堦俞溥臣陶卿田三上舍盧海樓都尉也

東風欲來猶未來水仙萼破山茶開閉關已覺有春意
將蠟游屐傾深杯朋儕簡札互招致埜夫襤褐容追陪
渡江試鼓木蘭楫飛舡剛熟蒲萄醅乘潮十里纔一瞬
臺榭離立珠江隈花明錦幄不知數春早羯鼓無煩催
衣香人影還復往似與蜂蝶相徘徊尋芳共道此間樂
攀條勿問何人栽新年行樂苦不足時時簫鼓聲如雷
我聞此邦夙繁盛方春車馬交紅埃甲寅以來世多故
曲池漸廢高樓頽承平景物幸復覩游人笑語爭諠阗
但夸粲然豔桃李豈知往者曾蒿萊花前俛仰意忘返

夕日欲落春潮回浮雲世事置勿道勝遊聊復同懽怡
漢陂杜陵客好事斜川元亮詩新裁時卿田詩先成願聞佳句
夏珠玉彌覺逸興餘尊疊登高人日有前例置酒更擬
臨朝臺

春晚郊行

埜興蕭然誰與同杖藜隨意趁春風新秧出水淺深綠
高樹作花疏密紅

春陰十里鳩喚雨野水一溪鳬浴晴行盡山邨忘日午
竹籬東畔忽雞聲

遣悶

炎紀多卑溼陰晴日幾回
午風蒸茉莉暑雨颭楊梅
頗憶郊居樂先愁客刺來
巡簷頻悵望海氣若爲開

夏夜雨後作

雨聲不作涼涼意自潛
引殘響桐竹間蕭寥意無盡
缺月出雲罅還爲雲所隱
簷牙墜流螢牆角號苦蛭
身心縱夷曠耳目轉淒緊
徘徊復裴回欲卧猶未忍
差欣竹簟乾不厭葛衣衫
低檠照細書意已與之近

爲林香溪學錄

昌彝

題其母夫人一鐙課讀圖

澹墨圖成感不支，高堂心事短檠知。
書聲竹屋霜嚴後，鐙影茆簷月落時。
從古名儒多母教，祇今薄海識經師。
誰知一幅荒寒景，中有孤兒淚萬絲。

入秋後餘暑轉甚排悶偶成

七月南中熱轉加，金風何日到天涯。
過時尙作黃梅雨，出水誰憐白藕花。
盆荷入秋後紅者不復作花而白者猶盛開夢覺有情皆

穴，螳官私無定是池蛙。埜夫不用青涼繖，亭午齋頭綠

峒茶

綠峒茶出廣西性寒能去積熱綠峒亦作鹿洞

立秋將一月矣暑雨方歇炎歊復蒸南中固多

秋熱無如今年之甚者

欲關迎涼室猶歌苦熱行旅懷如酒困殘暑與秋爭高
柳遲風色枯荷渴雨聲聞雲亦何事日傍嶺頭生

八月朔日大風雨閉戶惕息輒成短歌

墨雲如磐壓千里
朔風挾雨雨不止
鳴條破塊何足言
拔木偃禾猶未已
朱符術士書丙丁
黃馘老農占甲子
旅人茅屋坐愁歎
萬籟喧喧滿人耳
吁嗟乎今年不與
常年同忽焉酷暑
忽烈風旣憂苗殄
生百疾復恐積潦
傷三農海隅縱遐
遠亦在大化中蟻
蝨小臣竊欲箋天

公彈壓風伯收雨工兩儀益軒豁萬象皆昭融永永人
民壽考年歲豐吁嗟乎此事豈不由蒼穹

初秋嚴蘭史

家疇

彭南屏林子隅三太守馮雲

伯大令招集學海堂

依山啟精廬落日試吟屨酒人有秋懷相期此中去
厯磴躋古苔入門見高樹不知秋淺深黃葉下如雨賓
侶無雜言壺觴足供具豈惟文字飲亦愜山林趣中
酒思微吟褰衣起徐步石徑生晚煙涼蛩畚秋句

戲成二首

怪底鳴蜩恨費聲一株高柳暮涼生知他多少閒愁思
日對西風訴不清

牆畔涼陰合古槐飯餘隨意踴莓苔偶遺殘粒南窗下
引得蚍蜉血戰來

一笑

身本非官吏形何役簿書不堪供一笑祇是廢三餘白
日尋常過青箱大半疏偶然繙故紙慚愧見衣魚

齋前木芙蓉

并序

齋前木芙蓉不知誰植初在瓦甕中高二尺許耳今春

移之庭西隙地不數月高已出簷以爲花時必繁縟矣
旣而花開瓣薄如蠅翼色亦殊澹見者咸笑之雖然不
以色媚人華于凜秋霜風不能敗殆類于士之澹泊能
自立者爲之詩以慰之

木蕖開近讀書牀薄點燕支淺淡妝莫笑涼花少顏色
等閒禁得九秋霜

九月十四夜對月效誠齋體

秋來月色已殊勝何況今宵圓十分隨意杯槃雖草草
相看兒女總欣欣一庭白地化空水萬里碧天行片雲

怪道衣裳有香氣風前飽受桂花薰

玉仲於今秋北歸葬其先人副使公於西山別
後久不得書賦此寄之二首

萬里謀歸葬長征涕淚多秋聲在風木客路正關河雲
黯瀰岡表霜寒易水波定知經市上不忍聽悲歌

問訊西山路松楸大幾圍

君於數年前已種塋樹

南中感知已北

望涕霑衣丙舍風霜苦丁年歲月非期君崇令德努力

繼前徽

春日登越秀山尋朝漢臺故址

用前年龍川懷古詩韻○以下

甲戌

蕪絕當年朝漢臺東風三月木棉開祇今城郭餘春色
如此江山稱霸才翠羽珠璣曾北去樓船戈戟竟西來
休論左纛無消息沛邑歌風亦草萊

苦雨謠

二月收新糧三月插早禾早禾固須雨得雨復苦多如
何一雨三十日坐令阡陌成江河新秧不著土浮漾如
蓬科老農蹙額披一蓑黑雲四合重滂沱今年早作將
奈何將奈何可憐許爲告老農勿浪語催租縣吏將到

門作速還家具雞黍

廣東呼早稻爲早作

高樓

高樓二三月垂楊千萬絲當年此相見今日此相思
歌曲珠絡索酒波金屈卮春風狹斜路惆悵獨來時

送穎白入都四首

匹馬上幽燕風塵再著鞭晚交五陵客春別百蠻天
往來飛動意相對已華顛

湖海聲名舊星霜閱歷深不忘當世事眞有古人心
櫪驥志千里匣龍時一吟

清時須努力初不爲華簪

好去長安道重裁短後衣鞭絲搖客路柳色認

皇畿出處非無事功名自有幾期君宦成日早款故園

扉

頻歲驚離合相看漸老蒼祇今感歧路況復在他鄉嶺
海春三月旗亭酒一觴尊前語珍重天末意蒼茫

夢竹鄰效東塾體

新交交在面舊交交在心迢迢千餘里夕夢能追尋重
山雖云高滄海雖云深居然夜飛越相見開胸襟顏色

松柏古鬢毛霜雪侵此心尙如昔昔本不異今急柝破
殘夢曉寒入秋衾覺來轉怊悵挂壁留孤琴雲山有韶
護非復時所欽雖存太古器誰識太古音

竹鄰寄古琴於余齋故云

喜竹鄰歸自海南

再閱波濤海上來相逢笑口爲君開生平蹤迹雙芒屨
投老行藏一酒杯風月尙餘無盡藏江湖可有不几才
應知腰腳今猶健更擬扶筇上越臺

五月三日齋中獨坐聞江上競渡鼓聲慨然有

作

南風吹送怒鼉聲到耳無端感慨生
珠海憶當全盛日畫船曾逐少年行
甯知勝事非疇昔差幸蠻陬見太平
蒲酒一樽聊取醉榴花如纈照人明

苦熱有序

旬日來暑熱殊甚而官文書雜沓填委如風如火急勿
可緩伏几作書書不止汗亦不止意頗苦之旣復深念
世間苦樂豈有止境當此時有耕耨者行旅者征戍者
黃塵赤日中勞不得休熱不能避其怫鬱煩躁當有倍
蓰于吾者吾居一室中茶瓜在前几榻在側飢可以食

渴可以飲倦亦可以少息而猶自謂不適非惟昧於處
約之道其亦不達甚矣輒賦詩以自廣且以自警焉同
治甲戌五月十九日穀菴道人記

木几繩牀同一室階除不風有炎日案上官書動成帙
戢戢高屋當其前驕陽鱗瓦光赫然返射窗戶生青烟
此中有人方伏几置扇作書書不止流汗多于硯池水
硯池水熱勿歎嗟解渴尙有盤中瓜君不見老農午蹢
龍骨車

六月二十八日學海堂避暑簡行省諸君子

方夏思林居茲堂枕山翠意行喜其近跬步足流憩一
徑萬綠中日色不到地好風亦無心穿竹時一至忽聞
疎蟬聲頓覺有涼意藤簟石磴眠茗甌井泉試炎涼爲
去畱故不煩再計一笑謝諸公幸毋落吾事

是日公謫
畏暑不赴

秋暑

夏暑猶可避秋暑不可當火氣逼燥金六合皆驕陽高
田已苦旱水少秔稻傷大道午無風車馬塵沙黃我時
坐斗室揮汗如流漿客來論琴曲見謂遺清商長空赤
雲爍隘宇白日長幾欲疑西風不敢來南方枕簟夜猶

熱蟲蟲繞匡牀人訝三伏誤天愜一雨涼百蠻多瘴癘
千禩少雪霜宜平嶺海間終古稱炎荒

登淨慧寺千佛塔

土人謂之花塔

北宋有遺塔千載猶穹窿歲久氣象古地偏形勢雄盤
旋上復上戶牖面面同俯闌白日下平視青天空浮雲
萬里色落木三秋風人煙與城郭一氣歸鴻濛溟渤在
足底隱隱颿檣通島嶼遠莫辨險隘終朦朧登高發遐
想宇宙無終窮坐令萬古愁來自蒼茫中懷然不可久
卻下趨禪宮回頭望絕頂尙有斜陽紅

重九日登越秀山鎮海樓

搖落重陽節登臨旅客愁
歸雲滄海夕斜日碧山秋
疎鬢驚吹帽羈心入倚樓
如聞江北雁近亦到南州

送辛大

中仁航海之天津

有序

中仁字中仁餘姚人通兵家言兼精厯算之學閒爲詩
文稟兀自憲客廣州歲餘不得志去爲畿甸之游天寒
氣陰置酒爲別酒半賦此卽以送之詩效晚唐人體者
從中仁所好也

辛郎同旅居一月百回見束書忽分攜遠道指京縣遂

爲南浦別非復西園讌朔風壓離愁酒色難上面荒榛
越王臺去矣復何戀快乘渤海風天水白一片世途足
難難志士耐貧賤布衣報國心期汝終不變

隨山館猥稟卷之六終

隨山館猥橐卷七

山陰 汪琬 玉泉

詩庚

寄題梁福草比部

九圖

十二石山齋

比部蓄蠟石十二以

名其齋。

以下乙亥

奇章甲乙不可覩高齋羅列何寵褻風流應繼海嶽後
雲氣疑與夔巫通我欲從之碧山社誰其主者黃石公
願君勿使俗人見金釵錦屏方自雄

越秀山看木棉歸檢故友李竹香

鳳池

王少香

樾集中皆有木棉花詩戲次其韻三首

處處東風處處開
尋芳先到越王臺
春於此樹無遺力
花亦如人有霸才
北戶風光夸爛漫
南方火德入恢台
時清久已消烽燧
一任山城遠近栽

木棉一名
烽火樹

呼鸞道上豔陽時
海國春光此一奇
瘴雨蠻烟三二月
曉霞晴日萬千枝
炎官導從丹葵蓋
火帝軍容赤羽旗
姹紫嫣紅爭賞識
離交正色幾人知

紫宮雲氣赤城霞
化作春天得意花
南部歌辭徵絳樹
東皇樂舞絢朱華
槐檀蘊火無奇色
桃李迎風亦小家

譜就羣芳應一笑班枝吉貝認都差

春杪夏初日與雲堦溥臣諸子小集卿田寓齋

率成長句

屐齒尋常損綠苔高齋時遣一尊開庭多夏木陰陰合

客似羣鷗日日來中平聲酒心情須綠茗生衣天氣近黃

梅西園雅集南皮宴慙媿前賢有費才

無題四首

時客行省

誰向瀟湘問女英天河列宿自分明爭夸月殿無雙影
分唱霓裳第一聲東畔窺人星有暈西邊畱客雨無情

五官巾角休相詡棋局中心未肯平

草滿南園蜨亂飛飄鏗珠箔幾人歸簫吹紫玉難同調
帳設青綾未解圍彩鳳待銜雙綬帶文鴛空織九張機
分明舊繡波濤在顛倒天吳事總非

綺窗聲迹小驚猜賦就淩波只費才散雪難爲團雪曲
司風分築避風臺桂膏印臂春相似菱鏡顰眉午不開
二萬聘錢償未得鵲橋高處幾低回

卅六鴛鴦事可疑東堂消息更誰知錦絲非復同心日
玉鏡難窺避面時夜半不眠紅燭冷春陰無賴綠章遲

祇憐明月流黃織孤負鄰家五色絲

秋江曲戲簡玉仲

玻瓈江皺西南風眞珠小孃抱日紅水氣凝煙作秋暑
欲采白蘋無處所茂陵書客書一囊墨沈秋衫愁暖香
迷離舊影屏山隔今夜紅鸞應笑客

中秋夜張石鄰大令

琮

招集埜水間鷗館酒罷

登越秀山看月得詩四首

醉月宜得人看月宜得地衮衮城市中得此良不易撫
時值佳序好事邁仙吏深尊供賞會短簡喜招致池亭

左右開巾屨後先至俯檻搖波光推窗納山意獻酬無
雜言吟嘯有餘思酒闌望雲戀蠟屐猶可試

初夜月在水中夜月在山何況林壑美近在跬步間相
將歸蒼莽中路闕元關琳宮下雲幔石戶搖風鏤露寒

百蟲靜徑僻一鶴還黃冠弗顧客青籙邇立班吾儕墮

塵網清福天所慳如何學道人夜半不少聞小坐散腰

腳一笑舒醉顏清光滿峰頂作意重追攀

中路過鄧仙祠小憩

風襟六七月雲磴三百級憑高俯城郭光景一時集蒼

然煙氣浮忽化露華溼竿鐙影參差

廣州人家中秋皆懸竿鐙登高望之

燥若_{列宿}林木光煜熠苔石供露坐葛衣畏風襲夜深氣自
寒怕爾難久立各蹋樹影歸路陰草蟲急

昔年客南武僦宅山之陬涼宵發清興往往登高邱自
從壬戌來艱難寄他州殊方負佳節忽忽一紀周縱令
有風景亦苦無朋儔豈意塵埃中復此精夜遊詩成一
長歎境過不可畱安能碧山月長寫壽天秋

送林香溪學錄泛海歸閩中

溟渤此歸舟滄波照白頭獻書曾

殿陸娛老且林邱著述千秋業生平萬里游壯心應未

已風雨射鷹樓

君榜所居樓曰射鷹樓著三禮通釋嘗進于朝

將立冬矣而暄暖如初夏時忽雨忽晴一日數
變廣州氣候固與嶺北不同若是者亦不數見
也

晴雨竟無定寒暄何太偏泥融栽菊地人誤熟梅天止
酒愁中聖繙書抵小年蓬蒿在牆角青翠故依然

尙有

尙有紅闌在西風認小樓花涼偏近水柳弱不禁秋賓
客如黃葉林塘自白鷗煙波還似畫畫得幾分愁

十二月十二日過陸氏廢園見梨花盛開慨然
有作二首

雪不能香霰不寒十分開處五分殘嶺南可是春來早
竟與梅花一例看

憶昔東關手自栽花時已換舊池臺祇應晴雪成堆日
不記春園覲土來

送詠騷之肇慶

并序

詠騷與余交二十年矣聚散不恆而情好無間今年冬
君來廣州旬日之聚晨夕甚歡而鍾子之琴未希文通

之賦已作輒爲長句以寫鄙懷風格不高詞意凡下聊述生平久要之意冀爲別後相思之資云爾

北風吹霰不成雪衰柳旗亭未堪折送君重問石門船
二十年來幾回別別離隔面不隔心心在成連海上琴
珠江江水一千尺別意與之誰淺深晨星小聚浮雲散
忽憶生平同患難草檄圍城魯仲連聞笳華館劉公幹
頻年羈泊慣臨歧今日相看鬢已絲硯北題襟成昨夢
樊南貰酒感新知題襟貰酒開懷抱無奈分攜偏草草
旅客行蹤風絮飛詞人生事江梅老老我棲遲越水濱

素衣歲歲染緇塵，縱令海內多知己，何似天涯有故人。
故人別我還西去，曾是當年舊游處。鈴峽寒搖百丈風，
牂牁水暗千重霧。霧銷水落放扁舟，西上寒潮不斷流。
後夜相思今夜夢，定先君到古端州。

冬日微陰出郭得小詩四首

芒屨隨意出山城，雲壓寒山不肯青。半晌石溪橋上立，
小詩吟與鷺鷥聽。

日薄天陰步履遲，三冬寒暖布裘知。溪雲忽合山風輟，

應是前邨欲雨時。

廣州冬暖則雨，諺曰：冬雨汗流春雨披裘。又曰：春寒雨至冬寒雨止。

埜老爲園亦自佳
雜花叢竹手親栽
老梅可是少顏色
自向水邊籬角開

小娃隨母賽田神
綠布裙襦紫領巾
幾度自臨溪水照
可知世有浣紗人

元日用壬申韻

以下兩子

響竹重闌曉緋梅
小院春暖風舒草
甲妍日及花辰城
北幾鐙市

廣州元日卽賣鐙城北地僻鐙市近始有之

灋東猶旅人庾詞聊

札闌一試墨華新

江樓早集

飲饌皆效泰西

聊縱登樓目，闌干百尺高。
市聲爭曉渡，城影接春壕。
手擘瓊酥餅，顏酡玉色醪。
此中夸飲噉，吾意亦蕭騷。

出郭

不失春風約，斜陽出郭門。
稻畦城北路，茅屋水西邨。
蓑笠曾相識，桑麻得細論。
郊居原不惡，耕鑿長兒孫。

入春以來積陰不解寒雨間作輒成小詩

白日黯無色，青春如未來。
霜嚴凝木介，霧重損花胎。
檢點殘書卷，蠲除濁酒杯。

余止酒已數年

何由召風伯，一掃瘴雲

開

二月二十九日忽晴驟熱次日復雨

兩月陰雨一日晴東海煜煜紅輪生隔牆遙見嵐氣翠
出戶頓覺天光晶庭除花木起新沐喜色向我如將迎
疏紅濃綠更嫵媚鳴禽到耳皆歡聲陽光照地忽亭午
鬱蒸潮濕相合并座中執熱客流汗無怪童僕皆裸裎
黃昏雲氣漸膚合疏星三五黯不明短衾偃卧入非想
夢見海日輝蓬瀛豈知睡足窗牖白簷溜已作波濤鳴
披衣亟起望空際烏雲作隊西南行積陰忽霽霽復雨
天豈有意爲紛更乾坤消息自有漸孤陽難與羣陰爭

一朝快意不能久當其再發尤縱橫旅人感此長太息
有若宿酒疲朝醒且須置此勿復道連傾雪汁炊風鎗
蘭圃兄近寄
雪水一罌

初夏偶成

烏几鑪烟裊一絲窗紗日影故遲遲簾垂紫燕成巢後
人倦黃梅作雨時蝙蝠似聞爭晝夜蝦蟇原不辨官私
欲齊物論還無賴未必蒙莊是本師

贈賈虛谷

景芳

有序

虛谷吾鄉人寄家京師南北往來幾三十年

蘆溝橋上客一劒復南來道遠家難問途窮士不才旗
亭官柳少江驛野花開相見知何事春風老越臺

次韻虛谷感事之作

盜鐘嘻甚矣明燭事何如并五書譌馬朝三巧慕狙蛙
聲饒厚稟驚力任奔車鼠黠金釭燼犀燃水府虛忽驚
窺曲窠何以蔽周陟厯齒憎明鏡慙顏變訪書人皆防
市虎誰復察淵魚拊掌何多事牢盆不負渠

感懷二首

患難飢寒後艱虞性命存勞生今白髮落日幾朱門思

舊真疑夢論文亦感恩茫茫知己淚寥落故衫痕
振策雞棲倦談經馬廐閑不知何事樂偏向此中來枚
子飛書筆賓王作奏才古今遠相望風雨滿蒿萊

虛谷效元遺山雜著和之四首

有女學曠眉欲澣明紗意自疑溪水由來能照影
公將顏色怨西施

廿五離騷一再看生平未悔切雲冠菰蔬自有充幃分
何事須傷九畹蘭

點筆無心賦洛神流言伊闕太無因明璫翠羽非吾語

未學陳思怒灌均

襟霧茫茫晝不開傳聞牛渚足昏霾百年水府陰沈甚
終有然犀一炬來

杏林莊在珠江之南咸豐壬子許椒橋孝廉

和

光嘗結吟社於是忽忽廿餘載矣丙子夏日重

過是莊見壁上詩箋尙存追憶舊游慨然有作
墨痕猶認水西廊丁卯橋邊換夕陽華髮重經行樂地
傷心休問少年場綠楊船幔重三節紅荔池亭十八孃
人事已非賓客老舊題詩處怕思量

立秋後三日行城西雨中卽目

清商變時序殘暑鬱未收
破曉忽疏雨蕭然知已秋
我行城西隅雲暗風颼颼
枯茅壓壞壁落葉積古溝
彌望皆曠土衢徑不可求
如何都會中寥闕如遐陬
昔年此華屋幾日成荒邱
嗟哉勿復言地僻多古愁

夜雨

聞道偷淋雨能肥晚作田

廣州諺云早禾須白撞晚作喜偷淋里語謂晚禾日晚作

夜雨日偷淋

關心計秋穫側耳忘宵眠
紅燭江樓夜青篷水

驛年感懷無限事都到一鐙前

與玉仲夜坐用前韻

有約菰蒲舍同耕
穰田何時結鄰住
此夕對牀眠風雨
秋三徑江湖夢卅
年相看兩無語落
葉草窗前

再疊前韻示玉仲

新知遭按劔左計
失求田未必青春
誤真成白晝眠迷
花供小極止酒逼
中年莫作鹽車歎
駘欲度前

初冬驟熱已而得雨

從古稀南雪何人
畫北風地卑留瘴
氣雨晚負農功

秋旱

晚稻已損
雨無及矣

略見梅梢白遙聞
柏葉紅祇應間草
木不解

盜春工

十二月二十二日雨中戲成是日立春

三冬足晴日一雨忽春寒
尊酒宜深酌瓶梅得細看
山廚香餅餌野客爛衣冠
一笑桃符墨書成不冒乾

雜詩十首

青天雖云高白日無不照
赤霄生慶雲萬物有光耀
崑山韞奇珍不假貢廊廟
潛璞砒其輝砥砭或騰笑
小儒多目論世事復難料
所以蘇門人空山日長嘯

冒頓凌西京契丹轢北宋
中國方盛時兵力置不用
約

和或輪幣安我億兆眾漢文泊宋仁聖德天下頌民附
國亦安敵強勢難縱譬如元氣充風寒詎能中後人笑
其懦兵革日瀕洞輪臺及熙河追悔亦哀痛

大法小則廉上行下斯效真誠感應速初不藉條教異
同果未泯溷彼賢不肖敝車飾高名增戶工炫耀奈何
居上位輒以名自釣紛然勞百爲徒爾供一笑

廉吏不可爲此語殊未然何哉楚優孟抵掌霸主前弊
名在千載富厚僅百年底用爲區區效彼衣與冠負薪
甘食貧其子亦頗賢雖無寢邱封固已遺以安古人世

云遠遺事今尙傳奮筆著循吏吾慕太史遷

人生一世間所重者生氣奄然不自振陳人復何異奇
氣固難得真氣豈可無文章與勳業惟氣爲之樞有氣
風雲生無氣草木死善養吾浩然聞諸子輿子

東都重經術所貴能兼通當時鄭康成並世許叔重六
書辨聲義七緯甄纖洪沿襲至末流典籍生氣索駢連
三萬字傳會八十宗多識夸鳥獸瑣事箋魚蟲撫搏極
繁碎輿僻驚盲聾遂令賢達人舉此一掃空於書觀大
意既有諸葛公亦不求甚解復有柴桑翁

人生罕百齡名氏能千年文字苟不泯精神與俱傳著述或未能博涉亦自賢古來萬賢達與我相周旋奈何桐子輩卷軸仇讐然視肉畢其世此亦殊可憐

漢人尙名節末季多處士遭逢有殊途志操不相似蒼舊居鹿門身不入城市豫章下州榻已爲名所使名者實之賓隱矣安用此得無龐德公終勝徐孺子

爲詩道性情初不假題署奈何事標榜騷壇競攀附西江自爲宗北地固多助當時蜉蝣輩相率作羶慕慙心嗟未然借面苦無具未得夷光隳已失壽陵步我詩固

不工名氏亦不著要爲自怡悅非以博聲譽一言冷冰
雪萬象豁雲霧置之勿復道識者解其故

俚蟲六合內種類未可窮男女與飲食情欲無不同情
同性豈異未易輕諸戎遐陬乏先覺遂爾長顓蒙比聞
泰西人亦解尊儒宗經籍旣流布訓詁漸以通百數十
年後人民漸華風當見周孔教遍及蠻夷中異哉裨雅
各有此非常功

聞西人裨雅各在中國讀儒書者十餘
年近歸國中以四子書五經教授弟子

凡數
千人

初冬雨中作

入冬才十日一雨忽如春南雪不到地東風能倦人園
梅有消息庭草自精神更喜三條市全收十丈塵

元旦坐雨用壬申韻

以下丁丑

細雨重城曉繁花隔歲春

客臘立春

從今足佳日取次數芳

辰軒蓋喧衢路臬廬聚市人未妨茆屋底獨試玉壺新

邨行雜詩十首

破曉邨墟靜初春隴畝間水邊明白屋霧外隱青山

野水蘸楊柳春陰催木棉賣魚敲岸側叱犢斷塍邊

邨店臨官路漁磯接野橋竹深微闢徑溪小亦通潮

無數黑蝴蝶幾叢黃菜花春風如有意先到野人家
樹罅危樓出峯凹曲徑通繚牆紅一角知是梵王宮
劍戟襍農器旌旗飄野亭似聞弓箭社年少亦雕青
沙路連雙堠炊煙自一邨風來喧燕雀日出散雞豚
近郭耕桑地清時畎畝民頗能占歲事都解頌

皇仁

時詔
蠲逋賦

老農頭似雪相見語欣然細說承平樂乾隆六十年
骨相邨夫子爲農亦頗宜他年如學稼田水卽吾師
積陰作寒賦此自遣

低垂四野雲欲釀一城雨釀雨猶未成陰寒迺如許青
陽候已晚白日輝不吐旅人何所爲太息方閉戶

夜雨寒甚枕上作

急響飛簷溜嚴寒壓被絲頗疑三月雨不類百蠻天

時已

穀雨而嚴寒不解
南中所罕有也

有客憂兵氣無端損夕眠浣花溪上

住安得灋東田

喜晴

一雨二十日耳熟芭蕉聲今晨出不意雲散天已晴晴
光照几席頓覺和氣生花梢一禽語妙得春風情

送瑞南星太守瑞昌 薦入都四首

好作朝天集江山一路看春風過大庾曉日認長安報
最銅符重參承玉佩珊東京二千石惓惓幾劉寬

十載南中郡文翁再剖符

高州肇慶

患除瓜蔓水

肇慶居牂牁下游江

流歲濫君修城築堰以澹其苗

清寫荔枝圖乃績虞廷陟惟良漢詔專

他時循吏傳不獨侈還珠

祇有書盈篋飄然出峽舟人知賢太守地稱古端州遠
道雙旌暖輕裝一硯留龔黃與元白相望各千秋

自悔拋心力頻聞借齒牙羈愁感秋士宏獎愧春華別

意旗亭柳征塵驛路花周南留滯客目極鳳城霞

姚烈婦行

姚氏婦尹氏女夫病危婦心苦夫若不起當殉之此志
已決人不知人亦竟不知病亦竟不起夫逝矣可以死
淒風吹繡帷白日慘不明此時轉不聞哭聲藥甌在手
不願生但願魂魄能少待九天九地相隨行高者天屋
者地雖亡不亡有生氣我作詩歌紀其事烈婦之父爲
忠臣昔年殺賊亡其身

儋州知州贈
道銜金藻

烈婦二十始適人

結褵三載強仰藥一朝訣姚家於杭宦於粵事在光緒

三年季春月

劉翁通見過并序

翁江右人僑居珠江之南不入城市者三十年矣

高人憶我片帆開擬向茅廬共酒杯十里南風吹不斷
木棉如雪渡江來

讀弇州山人四部稿卽效其體二首

直思兼李杜未肯讓曹劉慘澹侵家難崢嶸人古愁意
原輕一世才自許千秋尙有滄溟子生平足倡嚮

七子當年體斯人未盡然崢嶸生不竝蒙叟論多偏流

別因時異華辭得氣先

駢體文自宋至明古意盡失集
中有文十餘篇效唐人體者雖

輪廓粗具而涂轍已開至明季
漸言六朝國初遂大盛矣

甘辛與丹素不廢至今

傳

邱孝女行

有序

孝女福建光澤人父玉珊試吏嶺南病歿孝女殉之大

吏爲請

旌焉

割臂祈父生仰藥從父死女兒至性有如此女家在光

澤姓邱名閭姑光緒丁丑年侍父居番禺是年六月二

十一父亡女亡同一日吁嗟乎父死則死生則生死耳
安知身後名空閨風雨夜來急一片曹娥江水聲

立秋後一夕雨

夜久忽疏雨坐來如許涼旅人感遙夕秋氣入虛堂螢
閃竹枝徑蛙喧芋葉塘根塵偶相接欣厭兩俱忘

秋眺六言二首

疎烟似雨非雨斜日將晴未晴落葉可知寒意殘蟬解
作秋聲

夕陰不分遠近秋氣誰知淺深雲際危峯落照霜餘平

楚疏林

秋日登鎮海樓

山迴南國三秋雁人上西風百尺樓
黃木扶胥知不遠海門落日古今愁

閱世

閱世心如水欺人鬢有絲
更從多病後卻憶少年時
浮海風濤倦藏山歲月遲
唯應漆園叟曠達足吾師

題虛谷詩集後卽效其體

書生不封侯自謂非英雄
萬古骭髀氣併入尺卷中
惟

持一寸心徑欲窺鴻濛苦語掣鬼淚奇葩奪神工良璞
光不耀亦與瓦礫同世人顧而笑天地生秋風

夜坐

立秋前五日

雨歇夕涼生虛堂欲二更流螢叢竹影荒草亂蛙聲地
僻秋心早人間夜氣清微吟答幽簾蚓竅響茶鎗

戲擬唐人小游仙四首

洞天玉戶不輕開憑仗青禽日往回忽地僊官齊起立
五雲閣吏一書來

偷餐靈藥偶生天便著還丹訣一篇持視羣真渾不解

墨痕如霧字如烟

自倚豪華傲列真術成畢萬不憂貧祇愁雞犬飛昇後
賸作天邊守廁人

誰從紫氣識元元柱下精文語不煩關吏卽今無尹喜
故應囊括五千言

使院見鶴戲成四首

秋老芝田不可尋園亭日影晝沈沈修翎偃蹇長脰瘦
未改雲山舊日心

顧影裴回欲唳遲九臬清響幾人知華堂簫鼓喧闌夜

不似緱山月下時

羽翰蕭颯態伶俜曾向空山伴道經今日聞琴君莫舞
此中人不讀黃庭

風前碧樹倦迴翔雲外青田事渺茫賸有胎仙風骨在
不同雞鶩競餘糧

初冬暄熱如盛夏時比年所罕見也

碧翁邇來頗好奇顛倒寒暑爲娛嬰立冬已逾趨小雪
亭午陽氣彌烈感時有客方長歎道逢貧子大喜歡
歲歉食闕衣褐單幸哉值此能少安安得今年有熱無

祁寒

次日驟寒

昨日之熱不可當閉門汗出如流漿今日之寒一何驟
簷簷籬頭朔風吼吁嗟乎小園半畝蕪不治蓬蒿荆棘
紛繁滋獠奴性懶倦芟薙賴有霜風此一時

送人北上

下吏青袍舊時人白眼看十年嗟短簿萬里上長安速
化今多術居貧古亦難歸耕無百畝未可厭微官

廣州雜感八首

客使院作

賁陽都會玉山頭

越秀山一名玉山

尙有籌邊百尺樓地重安

東夸使節天高直北仰神州千年羊石空陳迹萬里牂柯此下游試向朝臺高處立衣冠佳氣望中收

山海梯航萃一時螺舟神速鬣帆遲奇觀誰續虞衡志故事難稽市舶司鄭重職方詢土俗荒唐大長署蠻夷秦西夷酋來中國者自署位號皆仿內地官稱實則在其國中不知何官也依然黃木灣頭水極目波濤有所思

裨海源流許問津竟凌月竊駕飈輪殊方文貝趨中夏往日明珠豔大秦吹浪儘多魚作隊款關曾見雁爲臣

吞刀吐火休相訝
省識黎軒足幻人

握枋真愁倒太阿
勦人其奈惡賓何
祿祠別出尼乾道
兵仗誰當曳落河
百代汗青奇士少
一時金紫健兒多
似聞長劒伙飛在
肩蹋洪濤斫老鼉

卻從溟渤設雄關
幾許樓船指顧間
夜市帆檣螻蛄鏡
月秋風壁壘虎門
山軍威舊肅黃金
鉞貢事今多白玉
環旌節飛揚笳鼓
競元戎昨日射魚
還

爰闋禮樂自華風
鳥語誰令八譯通
士女焚香尊鬼教
市廛列器詫神工
乘查近且勞專使
著論方當憶徙戎

坐對桔槔長太息漢陰抱甕有衰翁

蜃霧茫茫晝不開登臨愁上越王臺故居間訪虞翻宅

新語無煩陸賈才荒成紅旗寒自捲高城畫角暮尤哀

白頭退卒斜陽下閒話戈船破敵來

使院有老人司灑掃者鄧姓年七十

餘自言嘗隸尺籍林文忠公擒義律時鄧方在督標也

油幕西風拂劍鋌書生豪氣久摧藏才名早愧東頭屋
文字差同北面房此日杜園多賈誼何人韋曲問賓王
一鐙疏雨空齋夜不讀孫吳讀老莊

初冬偶成

地僻知寒早天陰喜客來扶羸資藥石削迹喜蒿萊文
字徒爲累談啁亦費才臨餐忽怙悵空外澤鴻哀

江樓送客因寫望

聊縱憑高目難爲遠別心江聲三日雨雲氣半江陰落
木無高下寒潮有淺深遙知泊船處津鼓暮沈沈

嘉平六日五十一初度晨入使院爲避客計戲成

小詩卽以自壽

敢作千秋想聊偷半日間避人如小隱閉戶卽深山野
態雲同懶吟身石比頑他年學黃綺不假住商顏

次韻虛谷歸里留別之作

久旅才華斂窮交意氣真茫茫身外物袞袞眼中人薄
俗無奇士清時有逸民箕山幸無恙他日傍松筠

原作

會稽賈景芳
虛谷

相識徧南北惟君面目真青山應著我滄海少逢人
久閱風塵色當爲畎畝民故山猶可住生計在蒼筠

送徐伯熙

昶之山右
時伯熙
病初起

并州萬里路漫漫餞汝旗亭酒易乾旱久中都飛雪少
冬深大鹵朔風寒荒年行役途多險貧士謀生病亦難

莫負知交珍重意臨歧一語勸加餐

戲書

萬事皆偶然百年亦如寄徒以朝夕謀不免衣食計飢寒苟無虞便可畢吾世致欲求贏餘將爲造物戲儒者重治生謂是第二義稟性苦多偏經營乏材智錐刀與圭撮所爭亦殊細一笑姑置之聊用快心意

使院感事二十韻

聖代懷柔極諸夷締結牢難連爭飲啄梟散逞游翺誓酒黃龍定神弓白羽發嫚書詞詰屈要約氣虛囂薄海

需籌筆巖臺建節旄望洋深慨息開府聚英髦油幙名
原重鰥生禮誤叨鉛刀躬負愧金布事分曹削楮程功
亟焚絲刻意縑急逾飛鳥羽細或類牛毛感憤心如搗
低回首重搔騰牋晨弄墨走檄夕焚膏不寐時聞漏經
旬已腐豪尋常過丙夜何敢告辛勞百事供怊悵三年
足鬱陶秋風增白髮春草笑青袍作計拋斑管謀生羨
釣舫人才多杞梓吾輩且蓬蒿世豈虛奇駿天應掣巨
鼈會看清渤澥萬里靜波濤

隨山館猥稟卷之七終